

Morning Dogri (NSD) National News Bulletin 06-07-2024

आकाशवाणी

- प्रधानमंत्री नरेन्द्र मोदी होरें ब्रिटेन दे आम चुनाव च शानदार जित्त लेई लेबर पार्टी दे नेता कीर स्टार्मर होरें गी मुबारकबाद दित्ती ऐ।
- राष्ट्रपति द्रौपदी मुर्मू होर अज्जै थमां ओडिशा दे चऊं दिनें दे दौर जा करदियां न।
- उत्तर प्रदेश पुलसै हाथरस च पिछले दिनें होई दी भगदड़ आली घटना दे सरबंघै च मुख अरोपी गी गिरफ्तार करी लैता ऐ।
- संयुक्त राष्ट्र दे खाद्य ते राई—बाई संगठन एफएओ नै इस ब'रे आली सतह उप्पर अनाज दा उत्पादन 2 सौ 85 करोड़ टन रौहने दा अंदाजा जताया ऐ।
- महिलाएं दे क्रिकेट च दक्खन अफ्रीका नै त्रै टी-20 अंतराष्ट्रीय मैचें दी श्रृंखला दे पैहले मकाबले च भारत गी 12 रंजें कन्नै हराई दित्ता ऐ।

<><><><><><>

Modi- UK PM

प्रधानमंत्री नरेन्द्र मोदी होरें लेबर पार्टी दे नेता कीर स्टार्मर होरें गी बरतानिया दे आम चुनाव च शानदार जित्त हासल करने पर बधाई दित्ती ऐ। इक सोशल मीडिया पोस्ट च मोदी होरें आखेआ जे उनेंगी सकारात्मक सांझेदारी दी मेद ऐ जेहड़ी जे भारत बरतानिया दी व्यापक नीतिगत गठजोड़ गी सारें क्षेत्रें च मजबूती देग ते आपसी खुशहाली ते विकास गी बी बधाग। प्रधानमंत्री मोदी होरें ऋषि सुनक हुंदा उंदी बेहतर ते काबले तरीफ नुमायंदगी ते योगदान आस्तै धन्नबाद कीता जेहदे कन्नै बरतानिया ते भारत दे आपसी रिश्ते मजबूत होए न। स्टार्मर होरें प्रधानमंत्री दे तौर पर सुनक होरें दी थाहर लैती ऐ। लेबर पार्टी गी सत्ता च औने दा मौका 14 ब'रें परैत थहोआ ऐ। लेबर पार्टी गी वीरवारें होए दे चुनाव च 412 सीटें हासल होइयां जदके कंसरवेटिव पार्टी गी 251 सीटें दे नुकसान मगरा 121 सीटें हासल होइयां।

<><><><><><>

President-Odisha

राष्ट्रपति द्रौपदी मुर्मू होर अज्जै कोला ओडिशा दे 4 दिनें दे दौरे पर जा'रदियां न। राष्ट्रपति होर कल भुवनेश्वर च उत्कलामनि पंडित गोपाबंधु दास हुंदी 96 पुण्य तिथि आले कार्यक्रम च शामिल होंगन। कल राष्ट्रपति मुर्मू होर जगननाथ पुरी च गुडिन्चा यात्रा च बी शामिल होंगन। अपने दौरे दरान राष्ट्रपति होर उदयगिरी गुफाएं च बी जांगन ते विभूति कनुन्गो कालेज ऑफ आर्ट च क्राफ्ट ते उत्कल यूनिवर्सिटी ऑफ कल्चर दे विद्यार्थिं कन्नै गल्लबात करगंन।



Vice President

उपराष्ट्रपति जगदीप धनखड़ होर अज्जै थमां केरल दे दऊं दिनें दे दौरे पर न। ओहू अज्ज बडलै भारती अंतरिक्ष विज्ञान ते प्रौद्योगिकी संस्थान दे 12में दीक्षांत समारोह गी संबोधत करगंन। श्री धनखड़ होर संसिीन दे काबल विद्यार्थिं गी उत्कृष्टता पदक बी भेंट करगंन। ओहू कल कोल्लम ते अष्टमुंडी पश्चजल दा दौरा करगंन।



UP Police

उत्तर प्रदेश पुलिस नै हाथरस च पेश आए दे नस्स-पज्ज दे मामले दे सरबंध च देव प्रकाश मधुकर गी गिरफ्तार करी लैता ऐ। इस दर्दनाक नस्स-पज्ज दी घटना च 121 लोकें दी मौत होई गई ही। पुलिस तरफा दर्ज एफआरआर च देव प्रकाश मधुकर दा नां मुख अरोपी दे तौर पर शामिल हा। एहूदे शा पैहले अरोपी बारे जानकारी देने आले आस्तै 1 लख रपे दा इनाम बी घोषत कीता गेआ हा। नस्स-पज्ज दे मामले दे चलदे जिसलै पुलिस नै 6 लोकें गी फगड़ेआ, ओहूदे अगले दिन गै अरोपी दी गिरफ्तारी होई गई। एहू सारे गै सत्संग आयोजन कमेटी दे सदस्य हे। ध्यानजोग ऐ जे एहू नस्स-पज्ज दा हादसा मंगलवारें उसलै पेश होआ जिसलै अपने आप गी ईश्वर खोआले आला ते कथावाचक नारायण सकर हरि उर्फ भोले बाबा दा सत्संग चला'रदा हा।



Amit Shah

केन्द्री गृह ते सहकारिता मंत्री अमित शाह होर अज्जै कोला गुजरात दे 2 दिनें दे दौरे पर जा'रदे न। अपने दौरे दरान शाह होर अहमदाबाद ते गांधी नगर च बक्ख-बक्ख कार्यक्रमें च हिस्सा लैंगन। 102 अंतराष्ट्रीय सहकारिता दिवस दे मौके महात्मा मंदर, गांधी नगर च आयोजित सहकार दे समृद्धि कार्यक्रम च मंत्री होर खास तौर पर शिरकत करगंन। एह्दे मगरा अमित शाह होर अजमाइश दे तौरा पर शुरू कीते गेदे सहकारिता पायलट प्राजेक्ट दौरा करगंन ते चंगदा ग्रां, बानसकंठा च महिला दुध उत्पादकें च 0 फीसद ब्याज रपे क्रेडिट कार्ड बंडगन। मंत्री होर गोधरा, पंचमहल च महुलिया ग्रां च बी सहकारिता पायलट प्रोजेक्ट दा दौरा लांगन। शाह होरें दा पंचअमृत डेरी, गोधरा च सारे जिला सहकारिता बैंकें ते राज्य दी डेरिएं दे अध्यक्षें कन्नै बैठक करने दा बी कार्यक्रम ऐ। कल, अमित शाह होर रथ यात्रा दे मौके भगवान जंगनानाथ मंदर च मंगला आरती च शामिल होंगन। एह्दे मगरा मंत्री होर अहमदाबाद दे नयनतारा च मल्टी स्पैशलिटी एसएलआईएमएस अस्पताल दा ते अंबावती च विद्यार्थी भवन दा उद्घाटन करगंन।



NEET-PG

नीट-पीजी दाखला मतेयान 2024 अगले म्हीने दी 11 तरीक गी होग ते एह् मतेयान 2 शिफ्टें च आयोजित करोआया जाग। डाक्टरी दी पढ़ाई लेई नीट-पीजी मतेयान दे राष्ट्रीय बोर्ड नै एह् मतेयान लैने आस्तै नमीं तरीक जारी कीती ऐ। नीट-पीजी दाखला मतेयान तैह् तरीक कोला इक दिन पैहले अग्गे पाइ दित्ता गेआ हा। मकाबलेबाजी आले मतेयान दी विश्वसनीयता गी लेइयै लाए गेदे अरोपें दे चलदे एह् फैसला लैता गेआ ऐ।



Mobile

संचार मंत्रालय नै देसै च हाल च गै मोबाइल सेवा शुल्क च बाद्धे दे बारे च आखेआ ऐ जे मोबाइल सेवा, बजारी मंग ते आपूर्ति दे माध्यम कन्नै संचालित हुंदी ऐ। हाल च गै त्रै निजी कंपनिएं ते इक सार्वजनिक मोबाइल कंपनी नै सेवा शुल्क च बाद्धा कीता ऐ।

मंत्रालय नै आखेआ ऐ जे सरकार गाहकें दे हितें दी राक्खी करने, आधुनिक तकनीकें च निवेश दे कन्नै बवस्थित विकास गी बढ़ावा देने ते माली बवहारिकता जमीनी बनाने पर बी ध्यान देआ करदी ऐ। मंत्रालय नै आखेआ ऐ जे सरकार दी नीतिएं ते नियामक ढांचे दे नतीजतन भारत च मोबाइल गाहकें लेई लागत सब्बनें शा घट्ट ऐ।

<><><><><><>

FAO

संयुक्त राष्ट्र दे खाद्य ते राई—बाई सरबंधी संगठनें एफएओ नै इस बारे आलमी सतह उप्पर 285 करोड़ टन शा मते अनाज दे उत्पादन दा अंदाजा जताया ऐ। संगठन दे मताबक अर्जेन्टीना, ब्राजील, तुर्की ते यूक्रेन च मक्क दा उत्पादन बड़ा बेहतर रौहने दी मेद ऐ। एशिया च कनक दी पैदावार बड़ी खरी रौहग। मुंजी दा बी रिकार्ड 53 करोड़ 50 लक्ख टन थमां मता उत्पादन होने दा अनुमान ऐ। अनाज दे कुल उत्पादन च चौल ते मुट्टे अनाज दी हिस्सेदारी मती रौहग।

<><><><><><>

Amarnath Yatra

जम्मू कश्मीर च श्री अमरनाथ दी सलाना यात्रा पूरी चाल्ली रमानदारी ते बवस्था आले ढंगै सिर जारी ऐ। यात्रा दे 7में ध्याड़े कल 21 ज्हार 686 श्रद्धालुएं पवित्र गुफा च मत्था टेकेआ ते कुदरती बर्फू नै बने दे पवित्र शिवलिंग रूपे दे दर्शन कीते। एहदे कन्नै गै 29 जून गी शुरू होई दी इस यात्रा दरान श्री अमरनाथें दी यात्रा च हाजरी देने आले श्रद्धालुएं दी गिनतरी 1 लक्ख 52 ज्हार 946 होई गई ऐ। ताई जम्मू थमां अज्ज बडलै यात्रिएं दा इक होर जत्था 5 ज्हार 876 श्रद्धालुएं गी लेइयै जम्मू दे भगवती नगर आले आधार शिविर थमां घाटी लेई रवाना होआ। लौहकी बडिडएं कुल 245 गडिडएं दे काफले च रवाना इस जत्थे च 4 ज्हार 501 मर्द, 1 ज्हार 118 महिलां, 18 न्याणे, 215 साधु ते 24 साध्विया शामिल न जेहड़े बम्म बम्म भोले दे जयकारे लांदे पहलगाम ते बालटाल आले बेस कैपें लेई रवाना होए।

<><><><><><>

Women Cricket

महिला क्रिकेट च दक्खन अफ्रीका नै कल रातीं चेन्नई दे एम.ए.चिंदबरम स्टेडियम च त्रऊं मैचें दी जी-20 अंतराष्ट्रीय श्रृंखला दे पैहले मैच भारत गी 12 रंजें कन्नै हराई दित्ता। जित्त लेई 190 रंजें दा पिच्छा करदे होई भारतीय महिला टीम नै तैह 20एं ओवरें च 4 विकटें दे नुक्सान पर 177 रंज बनाए। एह्दे शा पैहले दक्खन अफ्रीका नै 20एं ओवरें च 4 विकटें दे नुक्सान पर 189 रंज बनाए हे।



Weather

जमौसम विभाग नै पंजाब, हिमाचल प्रदेश, हरियाणा, चंडीगढ़, पच्छमी उत्तर प्रदेश ते मध्यप्रदेश च अज्ज तेज बरखा दी संभावना जताई ऐ। एह्दे इलावा उत्तराखंड, छत्तीसगढ़ ते पूर्वी उत्तर प्रदेश च कल्लें तग बड़ी गै तेज मौलेधार बरखा बरने दी पेशगोई बी कीती गेदी ऐ। तोआई जम्मू संभाग दे मते सारें हिस्सें च जंदी रातीं होई दी बरखा करी लोकें गी जबरदस्त गर्मी शा राहत हासल होई ऐ।

